

續修博山縣志卷十一

人物志

名宦

史家之體循吏有傳而後之作志者做之茲土舊隸鄰封凡大夫師長郡邑志已詳其姓氏著其仁聲似無庸贅一辭焉雖然城彼東方烝民頌之循行南國甘棠愛之則有功於斯者可忘其美乎若夫一二古名賢卽事蹟不傳亦引以爲重非特景仰前徽抑以興起後人焉爾作名宦傳舊志

漢

范冉或作丹字史雲桓帝時拜萊蕪長遭母憂不到官議者欲

博山縣志

卷十一 人物志

名宦

一

以爲侍御史遁去居徒四壁處之裕如閭里歌之曰甑中生塵

范史雲釜中生魚范萊蕪卒謚貞節先生

舊志

唐

李陽冰淄川郡尉昔有碑記在文姜祠

舊志

梁

高霸乾化中淄州刺史歲旱祈禱於文姜祠卽日獲雨

舊志

明

魏怡北直南樂人選貢嘉靖二十六年任青州府捕盜通判嘗建層樓於府館以扞衛其治民也恩以用其法有政聲去之日積羨金四百置公署作經費不以一毫入宦橐其廉可知矣當

時之民生祠於范公祠側至今存焉

舊志

王世貞字元美號弇州太倉州人嘉靖丁未進士丙午任青州兵備副使嘗行部抵鎮覽形勢謂此巖邑聞昔賊屢倡亂莫不據此爲姦故生息蕩然有司者戍焉視猶暴之中野乃請建城三月而就民賴以安

舊志

趙存誠陝西人以選貢任捕盜通判時萬曆二十八年也鎮志謂其惠士愛民士民德之建祠立碑於碧霞行宮之左以宮爲公所修故惜年久傾圮碣石無存其詳已不可考矣

舊志

李延芳陝西人舉人青州府通判法紀嚴明令在必行分署在鎮蒞政之初卽立科條申明約束強暴者置之法一鎮畏服

舊志

博山縣志

卷十一 人物志

名宦

一一

李茂實陝西人崇禎間以選貢任青州府通判十四年奉檄征萊蕪新泰間土寇歿於陣祭法以死勤事則祀之公其有焉

舊志

清

齊登輔號泊菴江南桐城人選貢順治四年任青州府通判摻捕山寇撫綏鄉民三載升江西南安府同知有生祠在永濟橋

東畔

舊志

葉先登福建長泰人進士順治十八年由翰苑檢討出備秦普兵憲移判斯土時博邑尙屬益都爲鎮公搜採軼事輯爲鎮志蒞任三年文學政事係人深思實蹟載碑志有生祠

趙良璧字爾方號拙庵山西長治人康熙五年由戊子拔貢任

博廉隅自持用法無私除盜患地方安堵

武億字虛谷河南偃師人乾隆庚子進士在任創修范泉書院
課士子殿最振作士氣時和坤位宰輔作威福黨羽倚勢恣橫
爲邑患害公執法不撓擒而痛杖之奸黨斂迹

事蹟別有傳

何家駒字春谷安徽廬江縣人道光癸巳進士翰林院庶吉士
在任省刑薄稅釐弊剔奸明察善斷案無留牘重修聖廟及范
泉書院並籌備膏火獎勵士子士民頌之

邱文藻字采臣湖北黃陂縣人道光庚子進士性廉介苞苴不
行善風鑑時博邑文運衰弱六十年鄉試無入選者公修築峩
嶺文筆峯以萃山川之氣適大比中鄉選者數人又預察治亂

博山縣志

卷十一 人物志

名宦

三

之機知是地有匪警因預修城垣以防患至咸豐十一年果有
捻匪之禍幸城堅爲完得無恙

樊文達字子元安徽六安縣人先後兩任是邑咸豐間捻匪亂
公輯衆捍患保境衛民心力獨瘁僧格林沁大軍攻淄川公督
糧餉軍淄事定博無震鄰之患勤勞王事並惠及於博公與有
力焉

劉德沛字勉吾湖南武陵縣人在任愛民如子除暴安良盜賊
屏息暮年風化肅然夜不閉戶路不拾遺

陳文顯宰斯土僅年餘教化大行民歌來暮去之日民人送者
十餘里不絕

錢鏐江蘇陽湖縣人光緒壬午科舉人光緒十五年任博斷獄
能發伏摘奸苞苴路絕道路藉藉爭傳頌之

馬宏圖濟寧州人在任持風節請託不行洽輿情除吏弊省煩
刑減冗稅寬而有體吏治蒸然

鄉賢

不朽有三立德爲上故鄉先生歿而可祭於社者出處不必盡同要其人皆有本末非苟焉而已茲邑鄉賢有祠而崇祀者惟龍泉趙公考之郡志祀典所載邑更有人焉賢固不限於鄉而鄉則以賢重可不俎豆之乎若夫嘉言懿行可法可傳者雖未崇祀亦附列之以俟後之論定者作鄉賢傳

舊志

明

王讓字秉遜幼勤敏端恪讀書日積寸馳聲庠序間事親有孝行嘗廬墓致湧泉之應洪武末由鄉薦授國子學錄施教以孝爲先文藝書翰皆在所略諸生有以罹艱告者公聞之輒涕淚

博山縣志

卷十一 人物志

鄉賢

五

交下以故多所感化永樂中簡侍皇太孫讀書公在講筵首陳堯舜之道惟在孝弟人主躬行孝弟則天下感化不勞而治每談經必端凝拱立敷宣明暢太孫敬而愛之時同事者陳山張瑛以順旨被寵戴綸林長懋則強諫不少詭隨惟公謙卑自牧簡默寡言每進規諷亦委曲切中事情太孫斂容聽之益加禮重及扈從北行常被召見厚加賜予適甘泉教諭張昱東阿教諭韓岫永年教諭劉順皆被擢爲國子博士侍皇太孫讀書公雖先進以官序折節下之意恬如也洪熙初太孫正位東宮進左春坊庶子未幾東宮卽位是爲宣宗以傳導功升吏部右侍郎綸等皆居其次時同官黃宗載負才尚氣公每懷退遜遂交

好日密在部二年因浙江秋租負欠積多命督理未幾卒於官
時年七十有四公言若不出口而持身素履人所不及洵歷榮
顯恭儉若布衣時爲上簡注未嘗矜耀忠亮清介始終如一士
林重之崇祀府學鄉賢

舊志

趙敬簡號龍泉賦性淳樸不事矜飾而意之所是能爲人所不
能爲嘉靖丙午以禮經魁鄉薦時鎮礦徒未靖人心風鶴有不
可終日之勢公毅然倡議請於當道建城保守得報可遂率鄉
民披荆棘闢草萊閱三月而告成事鄉之人至今賴之以次選
盧龍縣令有政績擢鞏昌府通判事上使下多所救濟尋告歸
郡人留之不獲乃立碑以頌其德既里居與諸父老道甘苦共

博山縣志

卷十一 人物志

鄉賢

六

燕笑歡若平生貴而無驕有功而不德嗚乎可謂厚矣卒祀鄉

賢

舊志

孫震字鳴東號最陽以兄霽爲師無書不窺朋輩交友皆一時
偉望晚貢太學除濮州訓導後藝先行端身率士時流寇方張
揭竿徧野有數村連伍自相保聚或告州牧謂爲不軌欲以兵
襲之公力爭曰此鄉人爲自固計耳乃單騎直入其村有諸生
十餘人爭來邀至家默察之絕無他意與居三日反告之故皆
大驚羅拜且泣曰非賴先生數百家性命休矣歸語州牧事乃
寢未幾署牧篆數月治效懋著上官薦云品格壁立千尋才華
鋌分雙劍師儒重品濟世鴻才繼升濰縣教諭訓士如濮更因

其俗而利導之教化大行學使錢臨萊郡諸廣文廷謁獨謂公曰先生當世大儒欽慕已久乃設榻於公堂東北隅以待之其隆禮如此尋感疾及革沐浴更衣無一言及家事時隨侍者少子一孫一惟丁寧謹守先人忠厚家法孝弟力田守分讀書而已遂卒學使聞訃奠賻有加櫬歸紳士致祭郊外生徒哭送十餘里公呈祀人名宦以冢孫廷銓貴誥贈光祿大夫戶部尚書

崇祀府學鄉賢

舊志

張堯封字子華號南野先世稱白馬張氏父俊生子四公其季也爲繼室徐所出七歲失怙依母徐煢煢子立諸兄弟復以異母弟畜之公天性孝友事母務得歡心母病臥躬親七劑衣不

解帶者五閱月逮其歿也悲號骨立喪具如儀處諸兄友愛篤摯不以異胞自二或有陵侮皆曲承無忤色撫季兄遺孤如己子妹氏適丁某者邁疾日一再往旣而棺具喪葬皆毀資爲辦人以此賢之爲諸生移家學宮側習於禮容俎豆被服造次必於儒者從遊甚衆不能具束修者什七八反給饗殮佐之以故門下知名士以孤寒起者尤多如樂公行言王公弘化皆其高弟也教四子皆爲莊士家法醇謹不得輕是非人物卽對門生後進詞祠色溫溫其言若訥其行若俯不敢以齒德加人至人有急難空乏望門投止則解衣推食若將不及卽家無有常假貸與之叔子曉旣貴皆折券焉後曉仕司馬晉宮傳贈公如其官

翟鳳翀字爾騰號凌元萬曆庚子登賢書甲辰成進士初授吳橋令究心民隱歲祲多方賑濟日夕單騎詣廠取粥先啖躬閱唱散所全活以億萬計暇日進子衿而課之如范文貞公景文爲忠節名臣卽公所首拔士也調任邱邑當南北孔道輪蹄輻輳公剽割應酬恢有餘刃庚戌擢御史時神宗靜攝日久中涓漸作威福主權慮有旁落抗疏指斥呂貴冉登等且曰陛下一切政令批發雖曰親裁獨斷實非公聽並觀大臣造膝無從小臣叫閭不應所當前而善爲逢迎者皆宦寺也參嗔喜而居其會巧陰陽以行其私相引相煽轉伺轉工請乞差遣之命至不

逾時而用人行政偏以閔隔釀叢脞之階折檻批鱗之士或傳重辟而元惡大憝反以夤緣生出脫之路熒惑屢售浸假遂開如呂貴冉登凌應登之事旬日間迭見告矣臣憂其終故怖其始後至天啓間卒如其言癸丑巡按遼東還朝值山左大饑公具疏入告上遣御史過庭訓齎帑金十六萬賑之鄉人賴之以安繼以廷擊事召對輔臣無一獻替公具疏直彈又同官劉光復越奏獲罪竭力申掇亦侵輔臣未幾璫焰日張公抗疏日澈又攻禁地行刺之奸遂忤旨鐫秩調外光宗立起補留都戶部主政熹宗初擢武選司郎中晉光祿少卿壬戌轉大理寺丞尋升本司右少卿延尉爲天下持平公執法明允必矜必愼無宿

獄冤民甲子開府延綏威惠並著時神葭巨寇結連晉地肆行劫掠公巖檄道將密授方略不旬日縛至轅門遠邇寧謐嗣魏璫禍起惡公耿介矯旨削籍親識皆危之公坦然自若璫敗起用以少司農應召旋丁封翁艱服闋升兵部左侍郎巡撫天津勵精率屬百廢俱興漕河飛挽爲稽時刻中外倚重而公以病乞休矣及歸又遭太夫人之喪躄踊號泣病益增卒賜祭葬贈

兵部尙書

舊志

孫霽字顯東號曙陽敏慧夙成讀書每忘寢食而發爲文章秉經酌雅迴異流俗有名諸生間一時當事爭設榻待之益都令劉公顯菴延爲子師相得甚歡代閱試卷時鄭公之范翟公鳳

博山縣志

卷十一 人物志

鄉賢

九

翀麟次甲乙後先成進士及翟公令吳橋聘公復識拔范公景文等五人翟公薦牘所以有滿門桃李之語而公終困棘闈三中副車竟以明經老矣考職時范公已大拜而公不一至其門竟置縣佐其耿介如此後翟公撫天津復邀至幕代草防津籌餉諸疏言皆碩畫悉見施行而居家孝友始終不渝所得館俸必獻之高堂不敢一毫自私以居湫隘力庀四楹奉溫清供甘旨而自處弗計也弟震出入必偕日督課之不以愛掩教弟亦師事惟謹文譽日隆當時有二難之目猶子少患積聚常置諸懷撫摩無倦色以視第五倫一夜十起爲何如也以次選中湘丞慨然曰是豈不足爲政耶先儒有言一命之士存心愛物必

有所濟抵任循分修職不以名士襲虛聲亦不以下僚掩所學
尋升高山衛經歷遂解組歸子侄亦次授經俾底於成卒年八
十有餘以子景昌成進士知江西之南昌縣贈如其官嗚呼公
之所學與弟相頡頏而身後之報未可概論人生有幸有不幸
類如斯哉

舊志

趙課字龍溪先世有隱德父克用爲名諸生生七子公其季也
性孝友居父母喪哀毀盡禮兄弟友愛一堂怡怡時值明季隱
居獨善嚴以律己寬以待人推鄉祭酒鄉里有爭者皆質成公
公爲之委曲排解各令悅服而去久之人多感化偶有詬誶輒
自悔曰幸勿令龍溪公知也以視王彥方何以異或有踵門而

博山縣志

卷十一 人物志

鄉賢

十

告者泣曰某家貧三世未葬慕公之德敢請公傾囊以助不足
又稱貸而與之且曰君歸速舉大事勿以此爲外人言其生平
陰行善大率如此一日河水暴漲公曳杖而往河干適有女子
失足墮水公不惜衣履以杖援緩之出雖造次必以禮焉其家來
謝公辭不知以泯其迹嗚呼其立心制行於此概可見矣居家
教子勤懇雖小過必痛加懲創惟恐戕先人遺澤後以子振業
爲御史贈如其官又以孫進美貴晉贈中大夫陝西布政使司
參政鄉人思慕之皆稱爲厚德之報云

舊志

清

孫廷銓字枚先號沚亭少具夙慧讀書有神解長而博極羣書

明崇禎己卯舉於鄉明年庚辰成進士釋褐知大名之魏縣一
年調撫寧改監紀推官尋以世亂歸鄉里順治二年薦授河間
府推官分司天津衛漕務未幾內擢吏部稽勳司主事歷驗封
文選三年典陝西鄉試進考功文選二司郎中公之在吏部也
清白著聞時故相溧陽陳公爲尙書嘗云吾吏部皆一時之選
以語大器其惟選司乎謂公及曲沃衛公也擢太常寺少卿提
督四譯館八年奉使祭告南鎮禹陵南海道加太僕寺卿管左
通政十年正旦設朝大饗上獨召公問居里姓名甚悉二月超
拜戶部左侍郎明年請告歸省還朝改兵部尋遷吏部會廷推
大司馬至再特傳上諭曰中樞重任宜慎簡畀孫廷銓著升兵

部尙書半載軍政肅然提鎮大帥私謁不及門轉戶部尙書初
公佐戶部時歲會無總錄至是乃舉錢穀舊隸諸部者各還所
司條貫釐然歲會之成自此始典計二載政尙清簡務持大體
曲沃公以吏部尙書大拜廷議推公然代加太子太保疏辭不
允公在吏部久諳習故事旣爲尙書益以慎重名器疏通淹滯
爲已任虛公不爲適莫進少保十六年海寇入犯江南詔親征
公率九卿疏陳小醜跳梁六師未宜輕動俄有詔問方略具陳
事要且謂捷書宜旦暮至上嘉納之旣而果以蕩平聞公掌銓
六年恪守舊章吏不敢上下其手事有未便則條上而更張之
期於盡善嘗語同列曰吾輩臨事勿徒爲一司計也其通格之

關於諸司者當並計之勿徒爲一時計也其利害之隱伏於天下者當並計之其老成謀國類如此十八年正月世祖升遐公率九卿上請舉大禮疏廷議侃侃無所鯁避朝政大臣不悅弗顧也頃之請急歸省曲沃公以閣臣出掌部事而虛左以待公康熙元年還朝二年五月拜秘書院大學士入參機務三年曲沃公休沐歸未幾公亦予告蓋居政府僅一載而公病矣公之歸也年始踰五十兩親皆無恙踰年丁封尚書公艱日定省太夫人側猶孺子也所居在山中却掃謝賓客焚香著書又精琴理得意忘言在絃指之外所著有顏山雜記漢史億自訂詩文集琴譜指法其南征紀略則奉使祭告時作也卒年六十有二

博山縣志

卷十一 人物志

鄉賢

十二

謚文定崇祀府學鄉賢

舊志

民國

蔣衍升字錫蕃又字洗凡博山人祖仙舫博學工文令潛山有惠政父幼舫世其家學生子三衍升長蚤慧試爲文驚其長老十餘齡補博士弟子員弱冠試以冠軍食餼文譽藉甚而謙抑下人未嘗以能自多科舉羅^罷肄業本省師範學堂才旣俊邁入耳心通聽無不解遂冠其曹課餘同學踵集問難戶無停趾衍升虛心講磋商辨疑析各如其意又於其縣創高級小學鄉設蒙學經營締造多歷艱苦假歸躬往獎誘達材約數百人博山學堂自衍升始乙巳秋本省選送留日學生東渡入弘文學院

嗣轉法政大學法政專科弘文學院日人專設以教中國青年歲千餘人行升至無賢不肖一視同仁遇事盡力所能不求人知人所畏難卽自任物佳者予人自取苦窳者意欣欣以爲常或有過失爲掩蔽甚者力解釋之見其人必婉告曰君某事偶不檢知非本懷長若是人將難君聞者感服卽強橫不忍孤其誠也院有軍操學子旣多鎗械用後旋棄置或至摧敗衍升輒爲摩摺整理之如新問何爲曰適無事聊自遣耳不言其故居久之院內外識與不識人人傾心蔣君洗凡矣時列強有瓜分中國說聞之悲感刺指血書曰不清中原有如此血咏詩有義氣塞兩間肝胆照千古其素所蓄積也會先總理在日創立同

盟會因卽加入青年聞之相語曰蔣君加盟矣羣往從之山東支部遂成創周刊報曰晨鐘宣傳革命俾人警覺衍升主編輯闡民族主義尤深切動人辛亥春留日學生組中國國民會公推代表六人行升應首選由是各回國組模範體操團因爲推翻清廷計復設總部於上海以應各省衍升司部事聯合南北如指臂相應同志陳其美譚人鳳等往來滬上資斧或匱皆委曲欣給甚且典質衣裝不以告客辛亥武漢光復濟南相繼獨立山東同盟會支部推行升代表詣滬與滬督陳其美計劃軍事約爲應援南京政府成立命胡瑛督山東先遣杜潛代理衍升偕往烟台開府於烟任秘書長軍事民政多與籌商條理秩

然市肆無驚會以鴉片事不利奸商陰嗾降將虞際唐兵犯督署迫潛去職潛避登州市民惶惑慮變素悅衍升寬厚愛人攀轅不令去虞亦力請留烟以慰民望因暫留以俟胡瑛瑛至囚虞奪其軍衍升仍任前職事靡巨細由其調度內外翕然和議成瑛如北京留衍升結束善後事宜不激不隨歸於至當當虞叛潛時勢岌岌如不終日衍升鎮定如平時不改恆度卒使大局危而復安變軍擾而復肅非具大有爲之才而誠信足以孚人者何由致此其留烟也周自齊奉袁氏命督魯以衍升孚物望欲羈縻之以高等顧問聘不就又辟爲民政司司長却之及同盟會改國民黨被選理事并爲山東稽勛局局長不偏不阿

人無間言民國二年十一月袁氏解散國民黨各省支部一律解散魯督靳雲鵬突遣馬步隊圍省黨部黨人大恐衍升從容理遣無畏懼色亦無矯激之詞軍士相顧莫敢加以非禮旣而各散去黨人由是獲全及歸蟄伏里閤怡然自得也三年春徐鏡心被戕魯督承望風旨屢遣偵伺日照丁惟椽爲縣知事信其賢力解獲免其年秋日人佔據膠濟路紛集博山勢汹汹官紳聚謀請其出維艱局以保桑梓親故共勸阻之衍升聞命卽行泛應曲當心力交疲日人卒感誠就範地方以安四年袁氏閻干已著忌黨人甚羅者四出博山時方修志躬往窮谷僻壤搜剔古迹以避其鋒感疾數日遂卒享年三十有四民國四年

二月十日酉時也衍升一生善氣迎人弗問物我初若同流合
污及其決大事定大謀指揮如意剖判是非如山岳之不可撼
一時悍將汙吏猾胥僉壬恆思構陷黨人以邀功賞獨於衍升
如觸蘭臭不覺意消以故雖負盛名卒莫能害衍升有四子長
早夭次三於其病時先後暴疾死無何幼子又死遺腹一女名
梅春數歲亦殤異矣

翟鳳獅遺像



孫廷銓遺像



蔣洗凡遺像



孝友

孝弟庸德也而堯舜之道無以加焉三代以降其孰能與於斯哉雖然誰無父母誰無兄弟而天性涼薄者間軼於名教之外而不能復返其有一二至性過人之士尙能於毛裏手足間行古人之道苟不爲之傳焉將何以風勵末俗耶作孝

友傳

舊志

明

劉濬德字我白庠生週歲而孤性至孝克事厥祖晨昏定省儼若成人時與其叔同居及祖病篤議析爨叔意在新宅濬德甫十歲能會叔意請於祖曰母意重遷習居舊宅雖敝廬不忍離

博山縣志

卷十一

人物志

孝友

十六

也其不以讓自高如此祖大悅霍然病已又數年祖歿恪遵遺訓閉戶攻苦學行兼茂鄉里重之厥後子孫振振克自樹立益

徵義方之訓云

舊志

張聯軫字朗生號蓬邱大司馬曉之仲子也好讀書制藝爾雅天啓甲子以尙書魁鄉薦而爲人粥粥無貴介氣惟以孝友媻睦爲兢兢當大司馬四任西陲公佐理居多而察核撫賞尤非易事軍實陳因簡牘山積公繙閱會計纖悉靡遺其用力用勞爲何如也至大司馬謫宦粵東公從侍於六千里外厥後里居虜寇震鄰泣血登陴擲家全城直指爲上其狀儀部紀功則又其本行之所推而致者矣嗚呼以公之才使天假之年以需其

用更不知何如乃年未強仕而卒亦可悲也已

舊志

清

冷日升郡庠生父植元性好遊嘗於明崇禎己卯攜仲子日晟至嶺南未幾兵火翱翔滄桑代謝長往異域生死昧如順治己丑有洋舶飄入浙東風傳多中華人升隨督學翟公以往歷訪年餘罔有踪跡乃歸又數歲適里中趙公進美擢嶺西大參遂俱往有喬際寓者邑人也將客遊粵西遇之忽心動長跪涕泣託之訪求閱歲而喬自粵西來微聞其父消息已死龍州矣時升在端州至龍州五千餘里趙公移文左江道且具扁舟相送溯泮河而上灘險凡三百七十有奇其最者如蒼梧之長洲滾

博山縣志

卷十一 人物志

孝友

十七

龍南平之崆嶲銅鼓潯州之龍門虎跳南寧之火燄烏蠻太平之羊尾魚影波勢怒號危石側立舟蟻貫其中稍失尺寸立成壘粉雖長年篙師至此無不惴惴色變呼籲神明以求須臾之濟路出石門日停午舟子牽挽間虎出搏一人去其舟與人虎相牽絆幾俱廢柁師斧斷之得免至鹿村大風壞舟進退無策忽有揚帆而來者急呼求救至則豫章劉基臣趙公端州幕中所晤客也握手相慰遂附之同舟過橫州永淳達南甯則左江道已去任窘甚謀之基臣卽以嶺西之移陳情於南寧太守虞公慨然移書於思明府郡丞左右之蓋以土屬皆所統轄也再逾壺城則無復中華人矣形狀侏儻言語不達無可奈何之際

適遇廬陵彭相如者與際寓稱疇昔交往來於此久深得其風俗言語且際寓嘗以其事託之以故信宿商略俱返龍州又有客傳其弟晟寓遷隆地近分茅嶺卽古銅柱界也歧路徬徨艤宿不眠中夜嗚咽鄰舟有廉石玉者聞之問故遂寓書於其友明江任玉書爲之區畫其人任俠諸土司所信服又有德平人許鳳山避地於此哀其事同往明江思明當事因玉書護導甚備又二百餘里至遷隆晉謁司官情極惻且曰予龍州甥也總角時往來外家見有稱冷先生者其狀尙可記憶若有子如寓於此予必知之因徧訪不獲乃知傳者之訛也於是仍返明江復因玉書集明江之耆艾問之有那利蔡鄭二客嘗與元邂

近年皆耄矣聞升請扶杖偕往龍州路經滑石灘適與塾師譚遇蔡叟曰事有緒矣要與俱至乃至北門而荒茅鬱森無跡可辨越二日市人嚴世隆見之歎曰小子君弟之友也塋之日予以力助焉地不在此而在東郊且備述始末及啓棺一如嚴言而殉衣顏色如故遂奉櫬以歸葬如禮而其弟晟已不知所終矣嗚呼升之記其事也於康熙之二年距元南遊之日幾三十載卒之萬里窮裔克收骸骨非至誠感動不及此俎豆千秋亦

奚愧哉

舊志

翟元佐字丹衷夢予其號也父鳳挺卒三月而公乃生幼敏悟七歲就外傳日誦千言每遇版策中父母二字輒淒咽不下憾

己之未全其本諸性者渥矣明天啟癸亥以拔貢補文學掌故乙丑居祖父母喪孫代子職易戚如禮後釋褐中秘晉秩同卿時值羽書旁午邊務孔棘公既催攢薊密橐糧旋督運宣大月餉靡不克勦無負幸遇覃恩榮及所生非賢而孝者能之哉甲申運際鼎革當事者亟採遺賢復以原銜徵取監軍力辭不獲乃勉就事越月而巨寇受撫直指張公慎學疏薦得邀優敘公以高堂倚閭但從諸薦紳赴闕叩謝遂致仕歸

舊志

翟因培邑庠生元佐長子性純篤事親克孝爲人清儉勤飭雖生官家被服如寒素雅好讀書晝夜不倦後以父母相繼卒哀慟不已自誓從親於地下伯叔勸慰之不能解也旬月而卒人

博山縣志

卷十一 人物志

孝友

十九

皆惜之

舊志

翟因錡字信昭邑庠生因培仲弟也少失怙恃事祖母王孺人色養備至因培卒錡撫遺孤如己子又有異母弟三人親爲教授不啻同胞皆蜚聲鬻序後析爨以宅田之上者授弟侄而自守薄瘠里人咸稱其孝友焉

舊志

趙元美字嶙叔晚號育菴朝議大夫振業第六子也幼從宦遊長爲諸生好讀書累試不第食餼四十年貢於朝例授儒學訓導以衰晚不復有仕進志居家孝友善行未易縷指其尤難者康熙甲辰乙巳間僕區之令嚴奸人或引類誣指以快其私且緣以爲利當事者承意逮治時朝議公已告歸必欲面質非親

子弟不可代而長子繼美已卒第四子進美又遠宦四方元美毅然就繫前後陷縲洩中凡八次事白而家亦破矣其赴父兄之急爲何如哉庚戌辛亥連居父母喪罄哀盡禮不失尺寸壬戌丁生母憂亦然人皆稱之而自視欲然曰非諸兄誘掖不及此年近古稀乃自營壙於朝議公之側而自銘之曰吾終依吾父母也嗚呼如公者可謂以孝始以孝終矣

舊志

趙作肱字翼鄰生而沉敏及長學靡不究而仁孝之性尤不可及年十四補郡學弟子屢躋於鄉舉年三十八以子執信貴封如其官遂棄去帖括業奉父母色養融融內外族黨無間言年四十五居父喪竭情盡禮歉然猶若有未備者積憂勞遂得眩

暈疾偕配孫孺人奉母以居凡六載孺人棄世公抑情自力兼殫內職四年如一日而母八十七壽終公年五十有五矣凡附身附棺充充瞿瞿致毀無減前喪時由是疾益深恭於兄兩弟早世撫其遺孤有成從弟名作肅者與公情好尤篤疾革與訣過痛致成風痺右手足不仁歷十四年則公之至性爲不可及已其他賑窮周急未易更僕數要皆自其仁孝之心推恩而出故能事事克已利物有如是夫

舊志

劉宗延字伯緒濬德孫也三歲而孤母翟年二十一歲煢煢相依性穎異讀書過目成誦年十三補弟子員越二載母復棄世旣失怙恃又鮮兄弟有非人世所能堪者哀毀骨立至今人猶

道之每逢佳節忌辰悽然慘動食不甘味者累日事伯叔父母如事父母而羣從昆弟自相師友以通經學古爲先壯歲食餼康熙乙卯登賢書名日以起學日以進而心日以下辛酉子斯晉領鄉薦喟然嘆曰年少登科第一不幸未受伏案篝燈之苦而遽邀科名乃先人之德所致惟益卑牧攻苦以不墜家聲是爲賢子弟耳其念不忘親如此嗚呼可謂知本矣

舊志

趙作肅字齋如少孤終鮮兄弟十二當父大事如成人十四補博士弟子方讀書家塾而外侮叢集會僕區之令甫嚴株連者動至破家宵小以爲奇貨勢且岌岌僕楊遇春者毅然請代詣吏榜掠無完膚數瀕於死卒無辭事乃得解遂援例入太學尋

居母及祖父母喪皆盡禮盡哀三載蔬食鄉黨稱之其居生母喪亦然有姊適給事中孫君蕙卒猝不及治棺以己所儲佳木殮之居恒事諸父如父友從父兄弟如同產恆曰吾無父諸父卽吾父吾無同父昆弟同祖昆弟卽吾同父昆弟也故諸父皆鍾愛之叔父進美以按察使家居晚得疾彌留爲侍醫藥不解帶者旬月旣受遺託孤怨悔狎至弗爲動也蓋其天性孝友如此義僕楊遇春嘗周旋患難授以田養之終身及其妻子里中稱貸者前後折券至不可訾計顏文姜墓毀獨修治之則又其至性之所推暨者矣生平恬淡自安不求仕進好篆刻尤工畫

石間作小詩有見山堂刻本以孫憲貴贈如其官

舊志

張之堪字建臣父聯翼由鄉貢士知河南伊陽縣初無子以弟之子之翰爲子晚乃生堪幼有至性讀書敏悟過人五歲居母劉喪能盡哀禮繼母王性峻急時時責之以非其過每長跪庭中不避風雨必俟色霽乃起終不自明王感悟視之如己出年十九伊陽公卒兄之翰前舉於鄉官教諭於鰲山衛堪獨當大事經紀無闕未幾之翰亦卒事寡嫂謹甚初析箸良田宅悉推之嫂奴婢器具惟所擇嫂或挾長加以聲色怡然受之無少忤撫孤侄有恩從弟之成無子疾且革伏枕泣曰得兄一子嗣吾死不恨卽以第三子子之俄而子殤復子以第四子無靳色蓋其居心制行不愧於語所謂善人君子者矣生平淡泊寡營力

學攻苦聲出庠序間旣而數舉不售閉戶課子早夜指授長虞熙次虞言皆有才名先後舉省試而虞熙遂成進士後以虞言教授曹州贈如其官嗚呼天之報施善人豈盡不可信哉

舊志

趙執燧字德瑞號雪圃參政公進美孫也生四歲而孤稍長儼若成人事祖父及孀母咸得其歡心年十二參政公卒居喪哀禮俱罄人莫敢以童年目之有姊適直隸朱氏其翁某爲濰縣令以貪墨論死夫亦相繼亡茆茆孤寡歲不能保母日夜哀號遂持千餘金走京師贖其母子以歸母欲析產於女以爲生計燧曰諾敢有請嫁女例不分產今母與兒在何憂但恐後人不諒致啟爭端耳居無何有售產者價以千計乃令其立券於朱

而隱授其值於姊以與之人無有知者其曲體親心如此後家務牽縈帖括遂廢援例得主事職以母老不敢謁選人後喪葬禮畢遂南行宣力河上未幾攝淮安府山清外河同知篆已而卽真有前丞王姓者以負帑免官尋死其子孫無所償將就繫慨然曰四海之內皆兄弟悉肩之上官皆稱其義焉又值黃河水溢日不一食救護之費較常額爲加倍以故兩淮百姓免於墊溺而家亦自此破矣非仁厚性成者其熟能之越二載以病歸年五十有八而卒亦可悲已

舊志

張佶字克正父于惠早卒事孀母以孝聞家貧讀書外家嘗於宅中得遺金二百進之一無所取外祖父知其非常兒甚愛重

之未幾補博士弟子試輒冠軍康熙辛卯魁鄉薦四方求學者日益進隨才造就各如其意以去晚授長清教諭遇覃恩榮及其親衆趨賀遂泣拜不能起旣而謝曰風木之感觸緒生悲諸君勿怪也嗚呼其念不忘親於此概見矣尋告歸閉戶讀書不問外事研精理學奉薛文清爲宗七十有四臥三日而卒卒之日從容易簣無疾苦狀豈非有道之士乎哉

舊志

姚可榮字寬宇幼有至性父三正嘗販遊南方後一去不返杳無音蹟者八年榮晝夜思慕謂弟可章日子善事老母余往求之不見父無望歸也遂由淮浙至閩廣歷訪三載乃遇江南程某自海南來云見一老人姓姚氏山東人詢其年貌頗相似於

是決意之海南越險阻冒瘴霧歷瓊廉二州至暹羅諸國界忽染病將死有人乘騎至曰此孝子也出藥啖之尋愈起視之其人已亡去榮以爲神遂跨海而南遇父於安南國市惘惘如夢中旣而相持大哭旁觀皆爲感泣遂奉父以歸距其出門之日已五年矣歸半載而父卒嗚呼榮初非識文字者而其天性過人不憚萬里之遙延訪絕域使其父得歸故鄉以歿彼自負於冠裳禮樂之中者將何如耶

舊志

孫寶傳邑庠生廷鈇子年十二廷鈇卒居喪哀毀如成人事母孟孤苦相依受命惟謹兄寶傳有弱疾奉湯藥二十年無倦色兄歿撫其子女寡嫂賴之以安嘗餬口四方或以甘旨進輒淒

然泣下曰吾母與嫂在家藜藿且不給吾何忍食也有李姓萬鎰者憫其志贈以金遂拜謝歸置薄田數畝菽水承歡母以壽終嫂全其節孤子女亦相繼成立人皆稱爲孝友焉

舊志

樂可則字行遠少失恃終身孺慕不忘父綦中歲得足疾可則朝夕扶持凡瑣屑污穢之事僕隸所不能堪者皆以身親之三十年無少懈庶母竇生二女父病且革顧之戚然可則長跪涕泣曰有兒在何憂旣而父歿事竇有加禮二女長成一適蔣一適王于歸之際儀文具備觀者稱之而竇亦忻喜未幾而王寡上有孀姑下有孤子貧乏不能自存可則竭力周之姑媳賴以相安諸孤由是成立此皆人之所難能也子自京孝稟天性兩

居親喪疏食水飲三年如一日尤徵世德相承云

舊志

趙澤芳字滋百武生兄澤膏庠生年二十七病故嫂亦相繼亡遺孤允森甫數月時父母年近八旬痛長子之云亡悲幼孫之孤特幾不欲生而芳撫孤姪如己出稍長卽延師教誨以至成人父母藉是以安老而彌健焉乃允森旣生子龍光復故幼子孀婦芳又任之爲己責卒之龍光以弱冠補弟子員聲出庠序而膏之宗祀不絕者皆芳之力也不亦難乎

舊志

李櫟字虛一幼失恃繼母趙事之爲謹父病欲食果餌以非時不可得後見之卽泣涕異母弟桔已析箸家產蕩盡母將終兩目不瞑櫟喻其意長跪慰之桔以此無失所及桔故撫其子女

博山縣志

卷十一 人物志

孝友

二十五

爲之婚嫁復授田以爲長久計其不負死者又如此卽待宗族鄉黨亦然子所忠事親色養善承父志兄弟析產自取薄者姊妹早寡委曲周濟悉使得終其節庶母弟庠生所履貧老無子割愛嗣之其他善行不可枚舉迄今子孫昌盛人以爲積善之

報云

舊志

劉斯豐字晏子宗延幼子也五歲而宗延卒十四而伯兄斯晉又卒仲兄斯豫鰥居舌耕四方豐遂奉孀母韓移居山莊躬耕孝養供甘旨勤定省以一身任之母患癱症不能動履者四年飲食反側左右維持卽溺器亦親爲洗滌不以委諸他人母卒哀毀骨立年餘未嘗見齒母所嗜見輒垂涕不忍食遇父母忌

辰尤於悒不已撫兩兄子女如己出先後婚嫁賴豐之力居多
有姊適孫早寡家貧饗殮不給豐時其餽遺終身未嘗有間嗚
呼劉氏自濬德以孝友聞而宗延克繩其祖武觀豐之行可謂
無忝前修者矣

舊志

張佑字申季生二歲而孤稍長事母畢氏先意承志得其歡心
恭於兄奉命維謹無間人言年三十補博士弟子員益肆力於
學嘗曰朱陸異同至今未決總是理會格物未盡事物之理鑿
空如何窮得若能便是頓悟蓋聖道之所以異於二氏者全在
好學不獨聖經第一字亦論語第一字故曰以思無益不如學
也君子有九思不過隨事精察有慎思近思而無深思蓋格者

式也格式所以學也書曰學古有獲又曰監於先王成憲詩曰
率由舊章知在其中矣其解經類如此故躬行於家庭日用之
間者循循然莫不有規矩後母病且革醫者謂絕無生理佑禱
於天願減己算以祈母年越日病愈醫者驚歎不知其故又二
年母復病再祈不驗遂卒終喪佑亦尋卒嗚呼惜哉

舊志

薛國政幼有至性弱冠父歿居喪盡禮有弟妹二人尚幼母愛
憐之恐其不能成立也國政仰體母心極友愛之道弟稍長卽
延師訓誨至於有成蜚聲庠序妹適王貧甚爲之供其困乏母
好施與有不足者輒濟之國政無難色亦無倦心或有自爲周
恤者必歸而稟命於母焉外祖父歿爲棺斂葬獨力肩之而又

長其子孫資其婚娶以故母終身融融如也有司聞之旌其門
曰孝孚鄉黨

舊志

丁延吉字恆嗣其先世居八陡村父月白徙居村之東蘇家溝
而家焉月白得中壽以歿子三人長廣嗣幼蕃嗣延吉其仲也
同依母氏及長各授室始析箸廣嗣居所徙業延吉仍守八陡
舊居田僅六七畝屋止八九楹攻埏埴爲業初不識文字然其
孝於親友於兄弟則有不可及者母既年老兄弟且各居以雁
序計日遞養值延吉之日備甘旨勤省視不遺餘力焉及其兄
與弟也則奉母以往一切如常曾不少諉或謂之曰旣如此何
必以養母之名分之兄弟耶延吉曰吾母老久不見吾兄弟則

思思則不樂且弟爲吾母幼子母尤愛憐之藉是以圖朝夕歡
耳非爲名也嗚呼倘所謂養志者非歟廣嗣好嬉戲窘則不樂
延吉至其家必問於嫂曰兄樂乎嫂曰否延吉曰必無以爲戲
也傾其囊與之以歸而其弟嘗負債不能償延吉百計償之又
喪偶無繼娶資竭力與以三十金尙不足復謀諸婦婦亦賢以
私財益之於是人皆以延吉爲癡噫世之所謂智者好貨財私
妻子而父母兄弟間輒避匿若不相識若延吉者其以爲癡也
曷足怪哉

舊志

李乘龍字御天天性純篤事親色養融融四時之食必以進親
未嘗不敢先也親老病臥朝夕侍湯藥不離左右者八年親亡

三載蔬食不入私室親嘗於病中矢願施茶未遂而歿龍遵遺命行之十餘年以終親志至今人猶稱爲李孝子云舊志
康國琇性孝友居父喪哀毀盡禮母病衣不解帶數月而治喪一如其父兄弟四人宅田惟兄與弟所擇自處儉約恬如也後家漸裕養其兩弟兄亡撫遺孤如己出及長爲之婚娶人以此重之卒年八十有五舊志

孫琰齡字禹年兵部尚書之獬之子通政司左通政珀齡弟也清初開科選拔貢元截取州同知養親不仕順治丁亥有巨寇薄城公父司馬公奮義倡守屢挫賊鋒後賊伏內應城潰率家衆力戰不克命公請兵討賊公乘夜縋出隻身赴京匍匐千里

博山縣志

卷十一 人物志

孝友

二十八

及大兵彙至克城賊殲而司馬公已節烈殞身矣公之三姪一子同時飲刃一妻二女相携入井各有傳載通志公抱恨刻骨欲從父死者再戚族咸以無後爲解乃止後與兄通政公析箸而居兄宦遊京師以官事繫獄勢將叵測公冒霜雪間關奔赴竭力周旋至己亥春通政公減罪東遣公送出關慟哭投河賴救得免至癸卯有修工贖罪之令公欣然變產認上迎兄歸復室家完聚焉蓋自通政公被累以及回籍公出囊資二萬餘金變己產七十餘頃省邑巨宅蕩然一空眞所謂能篤同氣者哉所著有石來軒似懶園柿巖小律前後燕遊草藏於家見淄川縣志孝

友傳

舊志

譚振夏字錫九鄉飲介寶石門莊人立品端介兄弟五人分爨後獨奉母居別院曰母衣食險吾使之無事於兄弟也色笑承歡十餘年如一日嘗三購新產兄弟使之慨舉以授又嘗與弟易田弟田瘠益以金會弟歿姪反索金笑付之某姪家貧與之田使爲己業堂兄某病歿他鄉出貲營葬並贍其家族中之貧不能婚者助之娶鄰里之病不能醫者助之藥又擇鄉中貧甚者按日給之食以是得免破產離析之家可歷歷數村南山路起伏迂曲不便行人闢己地改築之里社有爭經公排解不費辭說而兩家無不悅服以去馴致鄉人有過失惟恐公知五十年一鄉彬彬稱爲仁里公爲人和易坦直對賓友無華詞對黠者亦無刻薄尖酸語溫潤樸質未嘗厲圭角峻崖岸示人以難犯蓋淵淵然莫測其高深也一時士君子至謂常人之所謂善士乃欲爲惡而不敢者若錫九先生踐履篤實出於天性乃眞善人矣當時之見推重如此光緒二十年逝世年七十五鄉里慕公德爲立永思碑志其行以示後人

王文傑字俊臣邑增生博學強識課蒙三十餘年以孝弟爲本文藝次之故門下多成德達材之士母歿哀毀盡禮其父娶繼室李公色養融融人無間言父歿欲以身殉又念繼母在堂弟尙幼不得不節哀順變搢拄門戶自是家日衰惟恃設帳以奉甘旨姊妹四一適丁早寡公以舌耕餘資時其餽遺終身未嘗

有間後教育其子成立心始慰晚歲復設童蒙帳於淄東道重
公高義爲出資俾營商家漸裕爲弟續娶繼室迨母歿公與弟
同居至老無間言

趙登昇字平仲鄉飲介賓九歲孤兄登甲年十三二妹甫離襁
褓家徒四壁母張撫遺孤晝夜泣公悽然以勤苦自矢慰母遂
操小生業日僅一飽積數年家漸裕爲母請旌二妹復遣嫁及
時與兄居門內無詬誶之言藩台吳以孝友可風旌其門鄉鄰
榮之

鄭毓桂字小山歲貢生國僑公次子副貢松圃先生之弟祖居
郭莊幼從兄讀卽知自攻苦耽於務博不利場屋年三十餘始

入泮迨科舉廢乃以舌耕給生活初先生弱冠時母命兄弟析
居兄耽心典籍不治生產歿後家貧甚先生每以歲得束儀之
半給之俾兩家用度如一而自奉母以居兩家子侄熙熙雍雍
若不知前日之曾析居也母悼長子之亡日愴於懷自得先生
敬養而意欣然亦頓忘所憂矣惜先生不永年僅五十餘而歿
錢永紀號理齋生有至性母歿廬墓三年道光初當事者以孝
廉方正舉力辭不就其不求知於人不希榮於朝如此歲甲辰
其孫奉勳舉於鄉邑人額手稱慶以爲純孝之報後經邑令邱
公文藻爲之傳廣西天保縣知縣沈毓寅爲之序邑人蔣天樞
趙國祕丁聯琇及山右唐象三寧州劉大紳蓬萊張榜諸名流

爲之詩贊板藏於家

東固山李揆方字道一歲貢生家素貧兄弟析居所得僅屋二椽地畝餘年三十出嗣叔母因反所析產而嗣母以有女故禁不同居亦不給予資產以故公罔歸僦屋而居以舌耕爲業然每自塾歸或歲時節序輒以甘旨奉嗣母而自甘粗糲二十餘年不言貧亦不怨及嗣母先是公反歸之產兄弟有典質出者公爲代贖還戒之曰先人血產當思所以守之後勿復爾當公之世兄弟雍穆鄰里化之聞公家七世候選訓導簪纓之裔宜有是人

張芹字瑞廷邀兔崖人幼受業於貢生鄭國僑蒙以大器許之

博山縣志

卷十一 人物志

孝友

三十一

年三十而孤以貧故棄舉子業躬耕事母給奉周至母八十九壽終三年公未嘗有喜容弱妹適任氏早寡而貧公收養之五十年供給無替當其母垂老時公已六十有奇猶與妹作兒童戲以博母歡古稱老萊娛親張公殆其人歟

楊殿福字備五年二十四父歿撫弟三人極盡友愛自恨少歲失學延名師教諸弟期以成立母患癱疾侍湯藥三年無倦色迨母病革禱於天願減己算以益母壽病果愈

楊殿楨字幹卿弱冠喪父依兄奉母陳深得歡心母遘癱疾衣不解帶者數年後兄弟析產田宅惟兄弟所擇鄉人咸迂笑之公弗顧兄亡恤猶子如己子人以爲難

謝京章字斐卿南博山村人性孝友讀書以敦行爲先家甚寒
恃舌耕養親妻張氏亦有順德公弟夫婦早亡遺女二子一撫
育至成立公無出卽以弟子兼祧太夫人年近七旬中風疾服
侍醫藥三年不懈太公諱馨年八十患偏枯醫弗效適值饑饉
家無宿糧公夫婦藜藿不充而奉養惟謹無一時少拂親意臥
病六七年事之如一日邑令盛公津頤題南陔媲美四字以旌
之

錢善菴性友愛兄弟同居五世不析公年已八十餘邑令武公
億旌以友于篤睦匾額今猶存

孫惟謨字次典於兄弟友事繼母孝父官臨江太守註誤不得

歸公告貸戚友走數千里爲營謀卒保釋以歸繼任湖南理問
病於署復竭力迎養得正邱首

孫毓恒字繡山國學生兄毓寅病革一子松年方周歲自知不
起託孤於公公泣受之兄歿與侄合爨撫養教育二十年不少
懈侄亦循循叔側不失尺寸公晚得痼疾侄躬理湯藥不倦如
是數年生養死葬如事所生亦足以覘公之教矣

孫志凝字績臣兄弟分炊後兩兄一弟俱歿所遺孤寡無依時
公初學經商力難兼顧往往假貸供給寧使妻孥資用有缺不
使諸孤寡資用不濟如是數年所入漸豐始令諸侄就塾師讀
俟諸侄成立始令自謀生計

呂金科字巍卿邑庠生父心農任教職及設帳於外者幾五十年公以道遠闕於定省恒鬱鬱及父晚歲家居得遂返哺之願意始帖然自是依依膝下不出戶庭一步惟家貧鷄黍之蓄時虞不繼幸弟金魁服賈贛湘家小阜甘旨之奉得以無缺公乃得坦然一意盡孝一味之調必躬親之夜伴太公寢卽牀頭蹠躩之役無不曲承以適親意偶見太公有不懌之色輒追問原由宛轉安慰如不解輒歸私室啜泣必俟歡悅而後已晚年與太公同設帳於家鯉庭趨步學禮問詩其樂融融太公卒年七十有九公年已五十餘矣哀毀骨立由是抑鬱成疾未幾年亦卒

敕封登仕佐郎張登階早孤年旣長以母病故寢饋母櫬側茹素誦經朝夕焚獻足不履戶外年餘哀^毀殿骨立母未及葬故於母柩側遺二子濯清濯華均能守先業不失

東關街姚春田孝子可榮五世孫父貿易於蜀行五月生春田及長以生不見父爲悲爲川商挽車往尋父川商詢得故半途贈以資俾自行抵打箭爐果遇父因同歸里此咸豐十年事也鄰人以公萬里尋親世所希聞請旌未果而大亂作事遂寢公卒年四十八其第三子樂賢入邑庠惜未及見

焦聖詠字永言性至孝幼讀書冀得科第以博親歡旣而困於場屋志猶不衰迨親歿遂無志進取教授生徒每講論涉及父

母字輒淒然淚下沾襟有蓼莪之痛

王書恂字筱泉歲貢生候選訓導早失恃事父歲貢生可亭公至孝處兄弟亦極盡友愛及教授弟子亦純以孝弟爲先務每晨必先令誦孝經陰隲文然後讀四書講史鑑必擇取古人孝弟諸事俾弟子節錄熟讀其立身制行可想見矣卒年六十五歲

王梓王增王福兄弟雍睦而妯娌勃谿漸至互相媒孽兄弟皆陽順而陰置之每兄弟自外歸聞門內詬誶聲輒相引避去就外食而敦睦如初久之妯娌感悟咸格於善一門輯睦子孫輩若慶祥布政司理問順祥濟陽縣訓導嘉祥豫祥萃祥及鳳誥

博山縣志

卷十一 人物志

孝友

三十四

鳳詔鳳詠鳳詔鳳詩鳳譔等入邑庠者六人考取實官者二人兄弟三人俱受封誥因號其堂曰怡怡至今子孫繩繩猶嘖嘖人口云

陳可經字維久號青麓七世祖所學順治初嘗以捕盜功授義勇官自高祖以下世修其德至父太溪公尤著公太溪公仲子五歲時採藥爲祖母醫目疾祖母嘆曰好孫兒惜吾向暮不及受汝奉養耳先生涕下不自禁旣受書十歲能屬文十九入庠第一每試輒冠其曹嘉慶庚申舉於鄉辛酉第南宮例注縣令先生不欲遠官投牒改學官丙寅補東昌府教授己巳遇國家錫慶封贈祖父皆如其官明年春太溪公有疾先生聞卽具文

乞養太守曰姑稍需吾將以卓異薦君先生辭之再終不許先生出卽携印付副學師孫公曰吾親有疾刻日望吾歸吾不可以寸晷延君爲我辭我行矣戴星馳還里太溪公疾日篤先生晝夜侍厠滌澣皆親治之時母太夫人亦得風疾與諸弟更代奉事不解帶者兩月餘旣連遭父母喪哀毀骨立戚友勸之先生曰吾獨恨解官晚耳是時前乞養之文尙在郡或謂宜亟報遭喪寢其文爲再選計先生不應其後服闋以原缺題補先生辭以疾曰昔之仕爲榮親故耳今親安在乎因欷歔涕垂膺竟不復起先生恬於榮利自守嚴而溫和無矜容與物以誠若不知世間有機事者勤於學自抄先哲語錄奉若圭臬好施與

餅無儲粟而賑窮如不及其在東昌時太守嵩公委以校刊郡志及閱試卷遺先生布履曰此吾內子自製欽公清德不敢以他物浼也後主般陽講院司訓岳公性剛厲謂人曰每見先生輒矜平躁釋斯其有不言之化歟道光十六年丙申歲饑邑令何公勸賑期以委先生枉車騎顧其廬先生疾已亟感令意曰此吾父母邦其可辭耶旣而竟卒何公聞之嘆曰嗟乎斯人之亡吾誰與化民者乎太息者累日先生卒年七十四長大本候選縣尉次利庚邑生員所作詩古文時文數百篇藏於家

伊若松字春園號了一父山母胡氏妻周氏繼娶程氏生四子孫曾繁衍亦邑之舊族也公自幼穎異總角就外傳讀卽朝夕

勤苦嗣知功名有分悟道由己乃日事玄功玩索易理得其奧旨事親孝處兄弟友生平茹素寡言教弟子亦以孝弟爲先咸豐十一年二月十二日捻匪大股入博父山適在城中與眷屬隔絕不得相顧公急不得入城遂負母奔避於九龍峪時山谷避難者婦女雜沓公登山椒覘賊不意賊猝至執婦女索財賄哭聲振山谷公疑母被執情急奮不顧身投崖而下昏迷之中若有神助竟落樹樑間爲人救護竟無恙而其母實未嘗被害也亂定因念死中得生遂終身誓不茹葷益篤孝行父母俱七十三歲終公由此持善念益虔濟貧恤寡常以力薄爲憾註有眞玄秘要匯集存於家年五十六歲無疾而終

袁斯顏字潤田聖朝司事得保獎六品銜好讀書尤精星曆堪輿之學性純孝母歿廬墓三年以茹素終其身卒年六十歲張式勤字成孚幼失恃受繼母李撫養總角讀書卽期實踐食餼後卽以設帳贍家計事親孝課徒雖勤不廢定省每夕課畢必入親室安置寢處俟親寢然後寢或暑月必手燃葦火驅除蚊蚤性和平卽有橫逆妄干必情恕理遣不與較嘗有市儈某以小故誤疑先生登門詬詈先生若弗聞後自悔長跪祈恕先生笑諭之而去其與世無競如此至義憤所激則有挺然不撓者蓋是時學署有陋規每科歲試新進士子學師必勒令奉進有趙學師元泰者勒索尤酷先生與李子英先生力矯其弊適

清廷有明諭禁止教官需索迺遵諭刊石爲戒以是忤學師因誣先生以不守學規訴諸上台事經府學派員勘問先生理直事遂寢而士林感悅惜先生數奇棘闈屢薦不售以廩生終門人爲立永思碑以誌感慕

劉毓麟字瑞生敕授承德郎邑庠生自幼從父梅溪公在肥城廣文署讀書性明敏尤長於歧黃之術每值府院試輒隨其父赴泰安檢場凡父飲食起居無不親身奉侍往返二百餘里無論寒暑必步馳以從片刻弗離如是者十餘年不稍懈及其父升任濮州學正年已七旬緣佐助有人常居於家尋常例行公事皆委公代光緒十七年辛卯冬大雪道路不通值院試期迫公不得已請於州牧代父赴曹州送考事竣返署因積勞傷寒成疾初不肯函告以貽親憂迨病篤始告又以雨雪間阻不得達遂歿於學署竟不獲與父訣聞者惋悼

周偲恭字遜亭山頭莊人無兄弟有女弟二一同胞一異母旣嫁皆貧公爲置沃田良宅並資給胞妹之夫得入武庠至其叔弟偲盛偲勤及其叔侄鳳柱亦各給予田宅待之如女弟尤爲人所難能也

王廷梁字茂齋邑廩生少失怙事母至孝家故貧藉舌耕供甘旨其誨人也以躬行爲教親老不肯遠離卽館於家弟夫婦早亡撫其孤無異所生年四十九卒門人思之爲立遺思碑列名

者五十餘人

丁毓輝字耀堂事親孝年弱冠母陳氏歿事繼母劉能曲體親意數年父又歿事繼母五十餘年孺慕不衰鄉里稱之

李克傑字子英歲貢生候選訓導樸誠忠直急公好義勸善懲惡人咸敬憚之幼失怙事母最孝稍長其戚張雲浦孝廉召從之學家貧不能具修脯孝廉飲食教誨之數年不倦學大進旋補博士弟子教授生徒以敦品立志爲急務不斷斷於章句之末也一時俊秀半出其門監試本邑范泉書院實事求是後習術數學並精堪輿得其奧竅清光緒初年教官勒索新進適御史錢寶濂奏參教官需索奉明諭禁止迺遵錄諭旨刊石爲戒

博山縣志

卷十一 人物志

孝友

三十八

時司訓趙元泰忌衆所爲捏稟上游歸獄董此事者上游委吏訊勘公反覆申辯吏爲動容事遂寢卒年六十有二

民國

夏侯贊字文卿附貢生夏家莊人少聰慧父芳邑庠生教之讀讀常過程父鍾愛之十八歲失怙而事母孝謹與諸兄游處無疾言遽色母每以仲子不善讀不能理家人生產爲憂公每時時慰勸且願以己所應得祖產推讓之母大慰後仲兄感公義頗能自樹立壯歲設帳稷門十餘年門下士多顯達者繼任河南歸德府南運局幫辦三年廉潔奉公義不苟取晚年任縣商會文牘排難解紛口碑載道民國五年護國軍入博闔境繹騷

公與諸同仁極力維持境賴以安六年秋土匪白天祖犯境勢甚危公與諸同仁電請陸軍痛剿匪平全境安瀾是時公籌辦餉糈及一切供應焦慮廢寢食者已五晝夜矣公生平嗜讀文藝書法兼擅其長又天性純厚人有所求力所能及者罔不勇爲以故里人德之至今卒年六十有七

張燿樞字拱辰少卓犖讀書以聖賢爲依歸弱冠入邑庠屢戰秋闈不售遂灰心進仕與人交坦白質直無門戶見好議論每與人讌集侃侃風生粹然皆道德之言聞者悚服然人有過輒面斥之不稍寬假人亦樂爲領受無後言事親至孝親所欲無不曲承當中年困阨時一家糟糠不飽而高堂甘旨必百計以

供父母歿爲位於室朝夕奠醊焚叩事之如生終其身弗替妻錢氏柳髯公長女頗賢公所欲爲皆能勦成之長子敬顥幼從公讀以優貢生筮仕晉省有政聲公數就養凡洩政臨民諸大端罔不詳爲指授是以服官二十年無隕越憂卒年七十二數月前卽預示撤瑟之期在六月六日未屆期前數日卽僵臥不起不飲不食問所苦則實無疾病但云欲尋親耳奄奄數日而逝計其期果符所言

魏樹藍字玉圃八陡鎮人幼純孝事母翟夫人及父紫峯先生無違言旣長益孝謹有所作必咨白而後行處家喜怒愛憎不專主於己惟親意之從雖一生無奇節異行而庸行庸言亦足

以風於鄉矣年四十九卒

博山縣志

卷十一 人物志

孝友

四十

續修博山縣志卷十一終